

SI JESUS ANG MANUGBULONG KAG ANG MANUGBAUTISO



Ang Matun-an Nimo sa Sini Nga Leksyon

Jesus ang Diosnon nga Manugbulong
Manug-ayo sang lawas kag kalag
Pagpadayon sang Iya bulohaton

Manugbautiso sa Balaan nga Espiritu
Saad
Katumanan

Jesus ang Diosnon nga Manugbulong

Sa mga pinanid sang mga ebanghelyo, masugata naton si Jesus subong nga Daku nga Manugbulong, Manug-ayo sang lawas kag kalag. Kag samtang nagapakighambal kita sa Iya mga katawhan, matukiban nga nagapadayon Sia sang Iya bulohaton karon.

Manug-ayo sang lawas kag kalag

Ano ang manugbulong? Ano ang ginabuhat niya? Ang sabat sa sining mga pamangkot makabulig sa aton sa pagkahamuot pa gid kay Jesus subong nga aton Diosnon nga Manugbulong. Ang isa ka maayo nga manugbulong


1. Buot nga magbulig kag mag-ayo sang masakiton.
2. Takos kag nakahanda sa pagbulong sang masakiton.
3. Lubos nga nagausisa sang iya mga pasyente.
4. Nagasalawsaw sang palaligban sang iya pasyente.
5. Nagareseta sang nagakaigo nga bulong.
6. Nagahatag sang bulong nga ginakinahanglan (nga may pahanugot sang pasyente).

Matuod bala ining anum ka mga dinalan kay Jesus? Huo. Ang tagsatagsa sini. Nagpakita Sia nga may pagkabalaka Sia para sadtong masakiton sa kalag kag lawas. Subong nga Manunuga naton wala na Sia nagakinahanglan sang "X-Ray" sa pagtukib sang aton mga palaligban. Nakahibalo kag nakahangop Sia sang aton mga kinahanglanon. Sia ang nagtuga sa aton kag madali Niya nga maayo ang tagsa ka bahin naton nga wala nagaandar sing maayo.

Ang kaayohan kag ang kaluwasan duha ka malahalon nga bahin sang pagpangalagad sang Manluluwas. Sa kamatuoran, ang tinaga nga *kaluwasan* sa Biblia nagsakop sang kaayohan para sa lawas kag subong man kahilwayan para sa kalag.

Mateo 4:3,24. Si Jesus naglibot sa bug-os nga Galilea; nagapanudlo sa mga sinagoga, nagawali sang Maayong Balita sang Ginharian, kag nagapang-ayo sang tanan nga sahi sang mga masakit kag balatian sang mga tawo.

Ang balita nahanungod kay Jesus naglapnag sa bug-os nga duta sang Siria, sa bagay nga gindala nila sa iya ang tanan nga masakiton, kag ang mga nagaantos sang ila mga balatian: ang mga ginagamhan sang yawa, ang mga kuyapon kag ang mga paralitiko. Gina-ayo sila tanan ni Jesus.



Mateo 8:17. Gingimo niya ini agud matuman ang ginsiling ni Isaias nga propeta, *Sia gid mismo ang nagkuha sang aton mga masakit kag nagdala sa iya kaugalingon sang aton mga balatian.*

Gin-ayo ni Jesus ang tanan nganagpalapit sa Iya para ayohon - ang bulag, ang masakiton, ang lupog, kag yad-tong mga tawo nga ang espiritu ginalukoban sang kahad-lok, pagpangduhaduha, kag dumot. Ang aton Diosnon nga Manugbulong nagkari sa paghatag sang kaayohan sa bug-os nga pagkatawo - lawas, kaisipan, balatyagon kag espiritu. Buot Niya nga magkalipay kita sa kabuhi sa kabug-osan sini.

Juan 10:10. *Ako nagkari agud nga may kabuhi sila, kag may kabuganaan sini.*

Buhata Ini

1. Ano ang nasakupan sang tinaga nga kaluwasan?

.....

2. Ano nga sari sang kabuhi ang buot nga ihatag ni Jesus sa aton suno sa Juan 10:10

.....

3. Suno sa Mateo 8:17, ano nga tagna ang may ka-angtanan sa Mesias kag natuman ni Jesus sang nagapang-ayo Sia sang mga katawhan?.....

.....

Pagpadayon sang Iya Bulohaton

Si Jesus sa gihapon ang Daku nga Manugbulong. Ginpadala Niya ang Iya mga sumolunod sa pag-ayo sang masakiton sa Iya ngalan. Ang personal mismo nga ginbu-

hat Niya sang yari pa Sia sa duta subong nga isa ka tawo, ginabuhat man Niya sa gihapon karon bilang sabbat sa pangamuyo.

Marcos 16:17,18,20. *Kag ining mga tanda magaupod sa mga nagatuo; sa akon ngalan magasubol sila sang mga yawa . . . magapandong sila sang ila mga kamot sa mga masakiton; kag magaayo sila.* Kag nagalakat sila kag nagpangwali sa bisan diin, samtang ang Ginuo nagapanghikot kaupod nila kag nagpamatuod sang pulong paagi sa mga tanda nga nagsunod.

Mga Hebreo 13:18. Si Jesu-Cristo amo man kaha-pon kag karon kag sa gihapon.

Santiago 5:14,15. May nagamasakit bala sa inyo? magpanawag sia sang mga tigulang sang iglesia kag pangamuyoan nila sia, nga ginahaplas sia sing lana sa ngalan sang Ginuo; kag ang pangamuyo sang pagtuo magaayo sang nagamasakit, kag ang Ginuo magabangon sa iya; kag kon nakasala sia, patawaron ini sa iya.

Buhata Ini

4. Hunahunaa: Ano ang kahulugan sang Mga Hebreo 13:18 sa Imo? Nagakinahanglan ka bala sang kaayohan halin kay Jesus.?

Manugbautiso sa Balaan nga Espiritu

Saad

Mabasahan naton sa Daan nga Katipan ang nahanungod sa mga pangulo sang mga katawhan sang Dios - mga propeta, mga sacerdote, kag mga pangulo - nga



napun-an sang Balaan nga Espiritu. Madumdoman mo nga ginhaplas sila sang lana sa pagpain sa ila para sa bulohaton sang Dios. May simbolo ukon kahulogan ang lana nga ginbubo sa ila. Nagasalig sila sa Dios sa pagbubo sang Balaan nga Espiritu sa ila sa paghatag sa ila sing gahum sa pagbuhat sang bisan ano nga ipabuhat Niya sa ila.

Sang isa ka adlaw, ang Dios naghatag sa kay propeta Joel sang isa ka tumalagsahon nga saad. Ang tion magabot nga ipasagahay sang Dios ang Iya Espiritu indi lamang sa ila mga pangulo kundi sa tanan nga mga katawhan.

Joel 2:28,29. Kag mahanabo sa ulihi, nga ipasagahay ko ang akon Espiritu sa tanan nga unod; magatagna ang inyong mga anak nga babayi, ang inyo mga tigulang magadamgo sing mga damgo, kag ang inyo pamatan-on nga mga lalaki makakita sing mga palanan-awon. Bisan sa mga alagad nga lalaki kag sa mga alagad nga babayi man ipasagahay ko ang akon Espiritu sa sadtong adlaw.

Pagkaligad sang pila ka siglo, ang Dios naghambal sa kay Juan Bautista nga ang Mesias magabautiso sa mga katawhan sa Balaan nga Espiritu. Ginpadala sang Dios si Juan Bautista subong pinasahi Niya nga mensahero sa paghanda sang dalan para sa Mesias kag sa pagpahayag sa Iya sa publiko. Dalagku nga guban sang mga katawhan ang nagtipon sa ang nagtipon sa pagpamati sang pagwali ni Juan. Mada-bautisohan ni Juan sa tubig sa pagpakita sa naghinulsol nga naghinulsol sila sa ila mga sala kag karon ginapanag-sang Dios. Si Juan nagsiling sa ila:



Mateo 3:11. Nagaba-utiso ako sa inyo sa tu-big sa pagpakilala nga naghinulsol kamo, pero ang nagakari nga dason sa akon magaba-utiso sa inyo sa Espiritu Santo kag sa kalayo.*



Wala madugayi sang ulihi ginpakilala ni Juan si Jesus sa publiko. Nannamit sia sing apat ka larawan ukon mga titulo sa paglaragway sa kay Jesus kag sang Iya misyon.

1. Kordero sang Dios.
2. Gamhanan pa sa akon.
3. Ang isa nga magabautiso sa Balaan nga Espiritu.
4. Anak sang Dios.

Juan 1:29,30,32-34 *Yari karon, ang Kordero sang Dios, nga nagakuha sang sala kalibutan! Ini amo sia nga nahanungod sa iya nagsiling ako. Nagasunod sa akon ang isa ka tawo nga nahauna sa akon, kay una sia sa akon! . . .

Espiritu nga nagakunsad subong sang salampati gikan sa langit, kag nagpabilin ini sa ibabaw niya.



Wala ako akon makakilala sa iya; apang ang nagpadala sa akon sa pagbautiso sa tubig nagsiling sa akon, 'Sa iya nga makita mo ang Espiritu nga nagakunsad kag nagapabilin, ini amo sia ang nagabautiso sa Espiritu Santo.' Kag nakakita ako kag nagsaksi nga ini amo ang Anak sang Dios."

Sa sulod sang tatlo ka tuig kag tunga nga pagpangalagad ni Jesus sa publiko, ang Iya mga gintuton-an mahimo nga natingala sa madamo nga mga tinion kon san-o Sia magabautiso sa ila sa Balaan nga Espiritu. Ining eksperyensya ukon inagihan ginatawag ni Jesus nga "ang saad sang Amay." Apang una sa tanan kinahanglan nga matuman anay ang Iya misyon subong nga Kordero sang Dios sa wala pa Sia mahimo nga Manugbautiso nila sa Balaan nga Espiritu. Kinahanglan nga mapatay Sia, mabanhaw, kag magbalik sa langit. Niyan ipadala Niya ang Balaan nga Espiritu sa ila. Sang gab-i nga wala pa mapatay si Jesus, ginhambal Niya ang Iya mga gintuton-an sang madamo nga mga butang nahanungod sa Balaan nga Espiritu kag kon ano ang pagabuhaton Niya.

Juan 14:16,26; 15:26; 16:7,13. "Kag ako magapayo sa Amay, kag magahatag sia sa inyo sing isa pa ka Mananabang, agud mag-upod sia sa inyo sa gihapon. Apang ang Mananabang, ang Espiritu Santo, nga ipinadala sang Amay sa akon ngalan, magatudlo sia sa inyo sang tanan nga butang kag magapahanumdom

sa inyo sang tanan nga akon ginsiling sa inyo. Apang kon magkari ang Mananabang, nga akon ipadala gikan sa Amay, ang Espiritu sang kamatuoran, nga nagagikan sa Amay, sia magasaksi sa akon. Walay sapayan nagsugid ako sa inyo sang kamatuoran: sa kaayohan ninyo ako magataliwan, kay kon indi ako magtaliwan ang Mananabang indi mag-abot sa inyo; apang kon magtaliwan ako, ipadala ko sia sa inyo. Kon ang Espiritu sang kamatuoran mag-abot, magatuytoy sia sa inyo sa bug-os nga kamatuoran.”

Pagkatapos sang pagkabanhaw ni Jesus, bag-o Sia magkayab sa langit, ginhambal Niya ang Iya mga sumolunod nga:

- 1) Una, batunon ang Balaan nga Espiritu kag ang Iya gahum agud nga sila magmangin-saksi para sa Iya.
- 2) Niyan, maglakat kag sugiran ang tanantanan sa bisan diin nga duog nahanungod kay Jesus kag sang Iya kaluwasan.

Mga Binuhatan 1:4,5,8. Kag sang nagapabilin upod sa ila nagsugo sia sa ila nga dili maghalin sa Jerusalem, kundi maghulat sang saad sang Amay, nga siling niya, “inyo nga nabatian sa akon, kay si Juan nagbautiso sa tubig, apang bautisohan kamo sa Espiritu Santo sa indi madugay nga mga adlaw kutob karon. Apang magabaton kamo sing gahum kon ang Espiritu Santo mag-abot sa inyo; kag mangin-saksi ko kamo sa Jerusalem kag sa bug-os nga Judea kag Samaria kag tubtob sa ukbong sang duta.”


Buhata Ini

5. Sin-o ang propeta sa Daan nga Katipan nga nagsugid kon paano ipasagahay sang Dios ang Iya Espiritu?
.....
6. Ano ang apat ka mga paglarawan nga ginpatuhoy ni Juan Bautista sang ginpakilala niya si Jesus sa publiko?
 - a)
 - b)
 - k)
 - d)
7. Sa diin sining mga masunod ang ginpatungdan ni Jesus subong nga saad sang Amay?
 - . a) Ang pag-abot sang Balaan nga Espiritu sa kalibutan.
 - . b) Ang bautiso sa Balaan nga Espiritu.
 - . k) Ang bulohaton sang Balaan nga Espiritu sa mga makasasala.
8. Nagsaad si Jesus nga ang Balaan nga Espiritu magahatag singgahum sa Iya mga sumolonod agud
.....
9. *Hunahunaa:* Kabiga nga isa ikaw sa mga gintuton-an ni Jesus. Basaha liwat ang mga pulong ni Jesus nahanungod sa Balaan nga Espiritu. Sa diin sa mga saad ang may labi nga bili sa imo? Ano ang batyagon mo sang nagsiling si Jesus: "Sa indi madugay nga mga adlaw mabautisohan ikaw sang Balaan nga Espiritu?"

Katumanan

Bag-o magkayab si Jesus pabalik sa langit ginhambalan Niya ang Iya mga sumolunod nga sa madali nga mga inadlaw mabautisohan sila sa Balaan nga Espiritu. Nagbalik sila sa Jerusalem kag naghulat. Pagkatapos sang napulo ka adlaw – sa Adlaw sang Pentekostes – natuman ini! Ginbautisohan sila (120 ka mga tumoluo) sang Balaan nga Espiritu kag kalayo. Kag nabaton nila ang gahum nga ginsaad Niya – gahum nga magmangin mga saksi Niya.

Mga Binuhatan 2:1-7, 11. Sang nag-abut na ang adlaw sang Pentekostes, nagtipon sila tanan sa isa ka duog. Kag sa hinali nag-abut ang hagnos gikan sa langit subong sang mamadlus nga hangin nga naghuyop, kag nagpuno ang bug-os nga balay sa diin sila naglingkod. Kag nagpahayag sa ila ang mga dila nga daw kalayo, nga natagtag kag nagatungtong sa tagsatagsa sa ila. Kag napuno sila tanan sang Espiritu Santo kag nagsugod sa pagpamulong sa iban nga mga hambal, suno sa paghambal nga ginhatag sa ila sang Espiritu.



Karon may nagpuyo sa Jerusalem nga mga Judio gikan sa tagsa ka pungsod sa idalum sang langit. Kag sang nabatian ining kagahud nagtipon ang kadam-an, kag ginlibogan sila, bangod nga ang tagsa ka tawo nakabati sa ila nga nagapamulong sa iya kaugalingon nga hambal. Kag nagirongan sila kag natingala, nga nagasinilingay: “Indi bala Gailean hon ini tanan nga nagahambal? . . . ginapamatian ta sila nga nagapamulong sa aton mga hambal sang dalagkung mga buhat sang Dios.”

Si Pedro, nga puno sang Balaan nga Espiritu, naghatag sang mensahe sang Dios sa mga katawhan: ginatan-aw nila ang pagtuman sang Dios sa gintagna ni Joel. Ginsikway nila si Jesus subong nga Mesias kag ginlansang Sia. Apang ginbanhaw Sia sang Dios gikan sa mga minatay. Si Jesus nagbalik sa langit kag ginpadala ang Balaan nga Espiritu sa Iya mga sumolunod. Nagapamatuod ini nga si Jesus amo ang Mesias.

Mga Binuhatan 2:32, 33, 36. “Ining Jesus ginbanhaw sang Dios, kag sa sina mga saksi kami tanan. Busa ginbayaw sia sa tuo sang Dios kag nakabaton sa Amay sang saad sang Espiritu Santo, ginpasagahay niya ini nga ginatan-aw ninyo kag ginapamatian . . . Busa kilalahon sing tutoo gid . . . nga ang Dios naghimo sa Iya nga Ginuo kag Kristo, ining Jesus nga ginlansang ninyo sa krus.”

Sa hunahuna mo ayhan nga nadumdoman sang mga katawhan kon ano ang ginhambal sa ila in Juan bautista nahanungod kay Jesus — nga ang mga katawhan bautisohan sang Balaan nga Espiritu! Matuod ang mensahe ni Juan. Si Jesus amo ang Karnero sang Dios, ang Manug-bautiso, ang Anak sang Dios — ang Mesias. Daw ano ka

makahalanuklog nga wala sila magtuo kay Jesus! Ang ila pagkadimatinuohon nagdala sa Iya sa krus. Mapatawad pa bala sila sang Dios?

Mga Binuhatan 2:37-39, 41. Karon sang pagkabati nila sini, nasuntok sila sa ila tagipusoon, kag nagsiling kay Pedro kag sa iban nga mga pinadala, “Mga kautoran, ano bala ang himuon namon?” Kag si Pedro nagsiling sa ila, “Hinulsol kamo, kag magpabautiso ang tagsatagsa sa inyo sa ngalan ni Jesu-Kristo sa kapatawaran sang mga sala; kag mabaton ninyo ang dulot sang Espiritu Santo. Kay ang saad sa inyo mga anak kag sa tanan nga yadto sa malayo, sa tagsatagsa nga tawgon sang Ginuo nga aton Dios sa iya.” Gani ang nagbaton sang iya mga pulong ginbautisohan, kag may gindugang sa ila sa sadtong adlaw nga mga tatlo ka libo ka kalag.

Gikan sa amo nga tion tubtob karon, ang libro sang Mga Binuhatan amo ang rekord kon paano ang mga mapun-an sang Espiritu nga mga tumoluo nangin saksi ni Jesus sa bisan diin nga duog sila magkadto.

Padayon pa bala nga nagabautiso si Jesus sang Balaan nga Espiritu? Huo! Ang tagna ni Joel nagakatumang labi pa gid karon sang sa nagliligad nga mga tinion sang kasaysayan. Minilyon ka mga tumoluo sa bilog nga kalibutan ang nakabaton sang pentekostal nga eksperyensya ang bautiso sa Balaan nga Espiritu. Si Jesus nagahatag sang bag-o nga kabuhi kag gahum sa mga kasimbahanan. Ginatawag naton ini nga *karismatiko nga pagbag-o*. Ang *Karisma* nagakahulogan sang dulot. Ang Balaan nga Espiritu nagkari subong nga dulot kag nagdala sang madamo nga mga dulot sang espiritwal nga gahum.

Buot ni Jesus nga mangin Manluluwas nimo, Manugbulong, kag Manugbautiso. Dalha ang imo mga kinahanglanon sa Iya. Itugyan sing lubos ang imo kaugalingon sa Iya. Sugataon Niya ikaw karon.

Buhata Ini

10. Pila ang napun-an sang Balaan nga Espiritu sadtong Adlaw sang Pentekostes?
11. Ano ang ginbuhat sang mga tumoluo sang napun-an sila sang Balaan nga Espiritu?
 - . a) Naghiwat sila sang kampanya sang ebanghelyo.
 - . b) Gindayaw nila ang Dios sa mga pulong nga wala nila mahibaloi.
 - . k) Nagpanaksi sila sa mga dumoluong paagi sa pulong nga wala nila matun-i.
12. Ano nga sari sang gahum ang nabaton sang mga tumoluo sadtong Adlaw sang Pentekostes?
 - . a) Gahum pangpolitika.
 - . b) Gahum sa iglesia.
 - . k) Espiritwal nga hagum sa pagsaksi
13. San-o naton makita ang labi nga katumanan sang Pentekostes.
 - . a) Sadtong adlaw sang Pentekostes.
 - . b) Sa nahauna nga, bahin sang ika-20 nga siglo.
 - . k) Sa sining tion sang karismatiko nga pagbag-o
14. *Hunahunaa:* Buot mo bala nga makita ang tanan nga mga Kristohanon nga mapun-an sang Balaan nga Espiritu kag nagapanaksi para kay Kristo? Pangamuyoi ining butang.
15. Usisaa ang imo mga sabat kag sulati ang imo rekord sang bumolutho para sa leksyon 7.

Leksyon 7 – Mga Sabat

Ang mga pamangkot nagakinahanglan sang 14 ka mga sabat. Kon may husto ikaw nga sabat halin sa 13 tubtob sa 14, labing maayo; 10 tubtob sa 12, maayo; 7 tubtob sa 9, kasarangan. Kon manubo sa 7 ang husto mo nga sabat, basaha liwat ang leksyon.

1. Kaayohan para sa lawas kag subong man kahilwayan para sa kalag.
2. Kabuhi nga may kabuganaan.
3. Sia gid mismo ang nagkuha sang aton mga masakit kag nagdala sa iya kaugalingon sang aton mga balatian.
5. Joel
6. a) Karnero sang Dios, b) Gamhanan pa sa akon, k) Ang isa nga magabautiso sa Balaan nga Espiritu, d) Anak sang Dios.
7. b) Ang bautiso sa Balaan nga Espiritu.
8. magmangin saksi para sa Iya.
10. 120
11. b) Gindayaw nila ang Dios sa mga pulong nga wala nila mahibaloi.
12. k) Espiritwal nga gahum sa pagsaksi.
13. k) Sa sining tion sang karismatiko nga pagbag-o.

Kadamuon sang husto nga sabat Grado
Karon sulati ang imo rekord sang bumolutho para sa leksyon 7.